

In hac etiam *Cilia* est ad Savi ripam, urbs uti apparet ex vestigijs, antiqua. Nam inscriptiones in ea plures nominum Rom. apparent, Opidani a Sulla conditam dicunt, vocarique *Sullacem*, nulla tamen auctoritate quam sciam, inquit Volaterranus. Nam forte ea fuerit aut ex ejus ruinis, quam Ptolemæus non longe ab hac ponit, *Celiam* appellatam. In Ducatu Stiria plures sunt Comitatus, inter quos *Warasdin*, ad Dravum fl. & *Lebnau* ad Muram fluvium. Fluvij rigatur *Stiria*, *Dravo*, *Lavanda*, *Sackan*, *Sulmo*, *Raynacho*, *Mura*, *Mariza*, *Arrabone*, *Flumina*, *Veysritz*, *Lausnitz*, ac infinitis propemodum Torrentibus ac rivulis, qui omnes tandem Danubio miscentur. Montium hic numerus non est, quare singulorum nomina adscribere vix licet, omnes pene generali nomine *Norica Alpes* dicuntur. Vnde Alpium adhuc præ se ferunt nomina, cuiusmodi sunt *Rauch Alben*, *Sub Alben*, *Saw Alben*, *Schwanberger Alben*, Inconfinijs Austriae, Carinthiae & Stiriae *taurus Mons* est: Muræ fluvio *Gesacus Mons* imminet, nunc vulgo *Der Schockel* vocatur, & *Sattli*, *Mansenperg*, *Weinsperg*, juxta Salzim fluvium dicitur *Ina Sawrussel*, hoc est, *os Porcinum*, *Deiffelsteig*, i. *Diaboli precipitium*. Infra Muram dicitur *in Gaistal*, *Stainperg*, & *Kainacher Alben*: Paullo inferius sunt, *Kreiczpergus*, & *Herrzpergus* montes: & versus Ortum *Radel* & *Plaitzperg*. Ultra Dravum versus Meridiem *Claudius Mons*, nunc *Dracimperg* dicitur. Refert Vadianus, quod superioribus annis Viennæ Austriae constans fama increbuerit, ardere in Stiria cœpisse montem, quo pellectus Maximilianus Cæsar Augustus, nuncijs ad inquirendum missis ita esse ut ferebatur compererit, quod miraculi loco hic recensere libuit. Hæc vero accidisse verisimile est circa annum Christi 1510, quo tempore Vadianus hæc videtur scripsisse. Prædicti vero montes passim, sparsimque Silvis vestiuntur, *Stirij* agrestes vulgo populi sunt & strumosi, adeo quidem ingenti struma nonnulli, ut ipsis loquelam impediatur, & mulier lactans illam post tergum perinde atque saccum rejiciat (si fama vera est) ne infanti impedimento sit. Memoriae prodit Ortelius se Frilachij dum anno 1515 Viennæ Venetias proficiscebatur, non sine admiratione hominem contemplatum, cui mentum ab auribus incipiens, humeros latitudine fere æquabat, & ad pectus usque propendebat. Strumæ causam Aquæ Aerique, quibus vescuntur incolæ, tribuunt, Stiriani cultu & sermone Germani sunt præter Dravi adcolas, qui Illyrica utuntur lingua.